

**Angerlarsimaffinni varmepumpenik aammalu solcellinik pilersitsinissamut pitsaaqutit aammalu ajoqutit misissornissaanut Naalakkersuisut nassuiaammik suliaqarnissaat pillugu Inatsisartut aalajangiiffigisassaattut siunnersuut. Nassuiaat taakkuninnga ikkussisoqartillugu Namminersorlutik Oqartussat tapiissuteqarsinnaanissaannut aaqqiissummik eqqarsaatersuutinik imaqassaaq. Nassuiaat kingusinnerpaamik EM 2023 Inatsisartunut tunniunneqassaaq.
(Inatsisartunut Ilaasortaq Nivi Olsen, Demokraatit)**

pillugu

Sanaartornermut Ataatsimiititaliap

Siunnersuutip aappassaaneerpeqarneranut

ISUMALIUTISSIISSUTAA

Sanaartornermut Ataatsimiititaliap suliarinninnermini ukuninnga inuttaqarpoq:

Inatsisartunut ilaasortaq Kristian Jeremiassen, Inuit Ataqatigiit, Siulittaasoq
Inatsisartunut ilaasortaq Siverth K. Heilmann, Atassut, siulittaasup tullia
Inatsisartunut ilaasortaq Harald Bianco, Inuit Ataqatigiit
Inatsisartunut ilaasortaq Anders Olsen, Siumut
Inatsisartunut ilaasortaq Jens Kristian Therkelsen, Siumut

UKA 2022-imi ulloq 25. Oktober siullermeerinninnerup kingorna ataatsimiititaliap siunnersuut misissorpaa.

Siunnersuutip imarisaa siunertaalu

Angerlarsimaffinni kissamik pumpinik seqerngullu qinngornerinik innaallagiussiuutinik pilersitsinissamut pitsaaqutit aammalu ajoqutit misissornissaanut Naalakkersuisut UKA2023-tinnagu nassuiaammik suliaqarnissaannik peqquneqassasut tamatumanilu Namminersorlutik Oqartussat tapiissuteqarsinnaanissaannut aaqqiissummik eqqarsaatersuutinik imaqassasoq siunnersuuteqartumit siunnersuutigineqarpoq.

Siunnersuutip Inatsisartunit siullermeerneqarnera

Siunnersuut ataatsimut isigalugu taparserneqarpoq immikkoortorlu ataatsimiititaliamit suliarineqartussanngortinneqarpoq.

Siullermeerinninnermut Naalackersuisut allannguutissatut siunnersuut tulliuuttut saqqummiuppaat:

” Kissamik pumpinik, seqerngup qinngorneri innaallagissiuutinik nukissiuutinillu allanik ataavartunik angerlarsimaffinni atuilernissamut Naalackersuisut pilersaarummik suliaqarnissaat pillugu Inatsisartut aalajangiiffigisassaattut siunnersuut. Pilersaarut taakkuninnga ikkussisoqartillugu Namminersorlutik Oqartussat namminerisamik pigisanut tapiissuteqarsinnaanissaannut aaqqiisummik eqqarsaatersuutinik imaqassaaq. Pilersaarut kingusinnerpaamik UPA 2024-mi Inatsisartunut tunniunneqassaaq”.

Siunnersuutip aningaasatigut kingunerisassai

Inatsisartut suleriaasianni § 33, imm. 1-imi allassimavoq aalajangiiffigisassatut siunnersuutip piviusunngortinnerani aningaasaqarnikkut allaffissornikkullu kingunerisassat siunnersuutip tunngavilersuutaani aallaaserineqassasut.

Siunnersuummi siunnersuutip aningaasatigut kingunerisassai allaaserineqartut, nalunaarusiortoqarnissaanullu miliuunit affaat immikkoortinneqassasut ataatsimiititaliamit maluginiarneqarpoq. Ataatsimiititaliaq tassunga oqaaseqaatissaqanngilaq.

Ataatsimiititaliap siunnersuummik suliarinninnera


Mingutsitsinermik annikillisaanissaq soqutigineqartoq siunissamilu immikkoortoq pillugu iliuusissanik suliniutissanillu aalajangiisoqartinnagu misissuisoqaqqaartoqartarnissaa pissusissamisoortinneqartoq ataatsimiititaliamit maluginiarneqarpoq.

Allannguutissatut siunnersuut akuersissutigineqassappat nalunaarusiap agguanneqarnissaanut piffissatut killiliusaaq siunnersuutigineqaqqaartumiit kingusinnerusukkut pisussatut allannguutissatut siunnersuutip assigiinnigissutaasa annerpaartaarigaa ataatsimiititaliamit maluginiarneqarpoq. Naalackersuisut allannguutissatut siunnersuuteqarnerminni iliuusissatut pilersaarusiortoqassassoq aamma siunnersuutigaat. Allannguutissatut siunnersuutigineqartumi aningaasatigut allaffissornikkullu kingunerisassai assigiipput taamaasilluni imarisaanik allannguinnginnissamik piumasaqaat eqquutsinneqartoq ataatsimiititaliamit nalilerneqarpoq.


Ataatsimiititaliap inassutai

- Ataatsimiititaliap isumaqatigiittup Naalackersuisut allannguutissatut siunnersuutaata akuersissutigineqarnissaa inassutigaa

Taamatut oqaaseqarluni isumaliutissiisummillu allassimasutut paasinnilluni matumuuna ataatsimiititaliap siunnersuut aappassaaniigassanngortippaa.



Kristian Jeremiassen
Siulittaasoq




Harald Bianco

Siverth K Heilmann
Siulittaasup tullia



Anders Olsen



Jens Kristian Therkelsen